

Evening Dogri News

27th July 2024

1815 hrs

Headlines:-

- 1 प्रधानमंत्री नरेन्द्र मोदी होरें आखेआ ऐ जे भारत गी 2047 तगर विकसित राष्ट्र बनाना हर इक भारतवासी दी महत्वकांक्षा ऐ ते एह लक्ष्य हासल करने च राज्य बड़ी सक्रिय भूमका नभाई सकदे न।
- 2 कुपवाड़ा जिले च कब्जा रेखा कश फौज नै पाकिस्तानी बार्डर एक्शन टीम दे हमले गी नाकाम बनाई दित्ता ऐ। टाकरे च इक जवान शहीद ते कैप्टन सनें 4 फौजी जख्मी होइ गेदे न।
- 3 जम्मू खित्ते दे आतंकवाद प्रभावत इलाकें च सुरक्षाबलें निगरानी बधाई दित्ती ऐ। पुलसै जोडा हमले च शामिल त्रै आतंकवादिएं दे स्कैच जारी करियै उंदे पर नगद ईनाम दी घोशणा कीती ऐ।
- 4 जेकेईडीए दिसम्बर 2025 तगर छत्तें पर लगने आले सौर ऊर्जा प्लांटें राएं 300 मैगावाट शा मती सौर ऊर्जा पैदा करोग। नमीं परियोजनाएं तैहत 22 ज्हार सरकारी इमारतें ते 20 ज्हार परोआरें गी सौर ऊर्जा कन्ने जोड़ेआ जाग।
- 5 श्री अमरनाथ जी दी इस ब'रे दी यात्रा दे 28एं दिनें अंदर गै तकरीबन साढ़े 4 लक्ख श्रद्धालुएं पवित्र गुफा च हिमलिंग दे दर्शन कीते न। अज्ज जम्मू थमां 1700 शा मते श्रद्धालुएं दा जत्था घाटी लेई रवाना होआ।

<><><><><><>

PM-Niti

प्रधानमंत्री नरेन्द्र मोदी होरें आखेआ ऐ जे 2027 तगर भारत गी इक विकसित राष्ट्र बनाना हर इक भारतवासी दी महत्वकांक्षा ऐ ते हर इक राज्य इस लक्ष्य गी हासल करने च मती महत्वै आली भूमका नभाई सकदा ऐ की जे ओह सिद्धे तौर पर लोकें कन्ने जुड़े दे न। श्री मोदी होरें एह गल्ल अज्ज नीति आयोग दी गवर्निंग काउंसल दी 9मीं बैठक दी प्रधानता करदे होई आक्खी। बैठक दरान 2047 तगर भारत गी विकसित राष्ट्र बनाने बक्खी ध्यान केन्द्रित कीता गेआ। एहदा मकसद केन्द्र ते राज्य सरकारें बश्कार भागीदारी आला शासन ते सैह्योग होर बधाना ऐ तां जे ग्रामीण ते शैहरी इलाकें च रौहने आले लोकें दे जीन जीने दे मय्यार च बेह्तरी आह्न्नी जाई सकै। गवर्निंग काउंसल च सब्बने राज्यें दे उपराज्यपाल ते केई केन्द्री मंत्री बी शामिल न ते प्रधानमंत्री होर नीति आयोग दे अध्यक्ष न।

<><><><><><>

PM-Modi

प्रधानमंत्री नरेन्द्र मोदी होरें नमो ऐप पर बजट 2024 दी मूल योजना सांझी कीती ऐ। एहदे मकसद रोजगार सृजन ते कौशल कन्ने सरबंधत बक्ख-बक्ख सरकारी घोषणाएं, योजनाएं ते नमीं पैह्लकदमिएं गी सौक्खे तरीके कन्ने समझाना ऐ। श्री मोदी होरें सोशल मीडिया मंच-एक्स पर आखेआ जे बजट-2024 दा लक्ष्य रोजगार कन्ने जुड़ी दी नमीं प्रोत्साहन योजनाएं दे राएं नौकरियां पैदा करना, इक तगड़े कार्यबल दा निर्माण करना ते नौकरियां देने आलें गी सक्षम बनाना ऐ।

<><><><><><>

Army Kupwara

कुपवाड़ा जिले दे कमाकारी सेक्टर च पाकिस्तान दी बार्डर एक्शन टीम-बैट दे हमले गी अज्ज भारती फौजे नाकाम बनाई दिक्ता ऐ। बैट दे इस हमले च फौज दा इक जवान शहीद होआ ऐ ते इक कैप्टन सने कुल 4 फौजी जख्मी होई गे न। फौज दे सूत्रे मूजब इस कारवाई दरान इक घुसपैठिया मारेआ गेआ ऐ। बैट च आमतौर पर पाकिस्तानी स्पैशल फोर्सिस दे कर्मी ते आतंकवादी शामिल हुंदे न। सूत्रे मूजब त्रै घुसपैठिए दे इक दल नै पैहले हथगोला सुट्टेआ ते फही त्रेहगाम सेक्टर च कुमकादी पोस्ट दे नेडे इक अगेत्री चौकी पर गोलीबारी शुरू करी दिक्ता। जवाने बी तुरत हरकत च औंदे होई परते आली कारवाई कीती ते टाकरा भखी पेआ। टाकरे दरान 5 जवान जख्मी होई गे जिंदे चा इक नै मगरा दम त्रोड़ी दिक्ता। जख्मी होए दे कैप्टन सने होरने जवाने गी उत्थुआं कडिड्यै बेस अस्पताल पजाया गेआ जिंदे चा इक दी हालत गंभीर दस्सी जा करदा ऐ।

<><><><><><>

Security Forces Doda

जम्मू कश्मीर च आतंकवादी गतिविधियां बधी जाने ते जम्मू खित्ते दे केई जिले च विदेशी आतंकवादिएं दे सरगम होने गी दिक्खदे होई सुरक्षाबले खित्ते च आतंकवाद करी प्रभावत होए दे इलाके च जांच नाके स्थापित करियै निगरानी होर बधाई दिक्ता ऐ। आकाशवाणी दे जम्मू संवाददाता मूजब हाल दिए आतंकी गतिविधिएं करी कटुआ ते डोडा जिला सब्बने शा मते प्रभावत होए न। इस फार्मूले पर अगगे बघदे होई सुरक्षाबले इक बारी फही हुन लोकें कन्नै जुड़ने दे अपने लतन तेज करी दिक्ते न। लोकें गी आखेआ गेआ ऐ जे ओह कुसै बी संदिग्ध नकलो हरकत दी जानकारी तुरत सुरक्षाबले गी देन। तोआई पुलसै डोडा जिले च इक कैप्टन सने 4 फौजिएं दी हत्तेआ लेई कसूरवार त्रै आतंकवादिएं दे स्कैच जारी कीते न ते उंदे सिर पर 15 लक्ख रपे दे नगद ईनाम दा ऐलान कीता ऐ। तोआई छत्तरगला पॉस, गंदोह, कास्तीगढ़, गद्दी भगवाह जंगले च 12 जून थमां 18 जुलाई बश्कार होए दे बक्ख-बक्ख आतंकी हमले च घट्टोघट्ट 10 सुरक्षाकर्मी जख्मी होई गेदे न। जंदी 26 जून गी जिले दे गंदोह इलाके च ध्याडे भर चले दे अभियान च सुरक्षाबले 3 आतंकवादिएं गी मारी मकाया हा।

<><><><><><>

Accident

सिनथन-कुकरनाग रस्ते उप्पर इक शिड़क हादसे च 8 लोक जिंदे च इक पुलस आला ते 5 बच्चे शामिल न दी मौत होइ गेइ ऐ। कुकरनाग दे सब डिस्ट्रिक मैजीस्ट्रेट सुनील अहमद लोन होरे दस्सेआ जे अरशान दकसुम दे कोल होए दे इस हादसे च इक पुलस आले सने 5 बच्चे ते 2 महिलाएं दी मौत होई ऐ। उने आखेआ ऐ जे एह गड्डी जिस च एह सारे बैठे दे हे, मादवा किशतवाड़ थमां आवा करदी ही। इंदा पोस्टमार्टम एसडीएच कुकरनाग च होआ करदा ऐ। उपराज्यपाल मनोज सिन्हा होरे इस शिड़क हादसे उप्पर डूहगा दुख प्रगट कीता ऐ। अपने सनेए च उपराज्यपाल होरे आखेआ ऐ जे अज्ज अनंतनाग दे दकसुम च होए दे इस शिड़क हादसे नै उनेगी गैहरा दुख पुज्जा ऐ ते पीड़ित परोआरे लेइ दुख सैहन करने दी परमात्मा कोला प्रार्थना करदे न। उने जिला प्रशासन गी हर संभव मदाद लेई निर्देश दिक्ते।

<><><><><><>

APJ Kalam

अज्ज राष्ट्र साबका राष्ट्रपति ते मन्ने परमन्ने दे साईसदान ए.पी.जे.अब्दुल कलाम होरे गी उंदी 9मीं पुन्यतिथि पर भावे भरोची श्रद्धांजलि देआ करदा ऐ। उने भारत च अंतरिक्ष ते मिसाईल विकास कार्यक्रम च महत्वपूर्ण भूमका नभाई ही। उने मिसाईल मैन ऑफ इंडिया दे नां कन्नै बी जानेआ जंदा ऐ। उंदा देहांत अज्जै दे दिन यानि 27 जुलाई 2015 च होआ हा।

<><><><><><>

Amarnath Yatra

अधिकारिणं मताबक इस बरे दी सालाना श्री अमरनाथ जी दी यात्रा च तकरीबन 4 लकख 50 जहार यात्रुएं पवित्र गुफा दे दर्शन करी चुके दे न ते एह आंकड़ा पिछले बरे दे आंकड़े गी पार करी चुके दा ऐ। अधिकारिणं मताबक कल संजा तगर 8 जहार 781 यात्रुएं बालटाल ते चंदनवाड़ी रस्ते राएं यात्रा करियै पवित्र गुफा च हिमलिंगम दे दर्शन कीते। 1 जहार 771 यात्रुएं दा नमां जत्था जम्मू दे भगवती नगर आले आधार शिविर थमां कश्मीरलेई रवाना होआ। 52 दिन चलने आली एह यात्रा सौन म्हीने दी रक्खड़ पुन्नेआ गी खत्म होइ जाग। इस दिन हिंदुए दा ध्यार रक्खड़ी बी हुंदा ऐ ते एह ध्यार इस बरे 19 अगस्त गी आवा करदा ऐ। इस दिन पवित्र छड़ी श्रीनगर दे दशनमी अखाड़े थमां पवित्र गुफा महंत दिपेन्द्र गिरी जी हुंदी सरपरस्ती च पुज्जग। इस छड़ी यात्रा च केई साधु ते श्रद्धालु बी शामिल होंगन। पूरा दिन पवित्र गुफा च पूजा दे बाद पवित्र छड़ी उस्सै दिन संजा लै पंचतरणी उठी औग ते राती लै उत्थे बसांह करियै अगले दिन एह पहलगाम वापस आई जाग।

<><><><><><>

PM-Mann Ki Baat

प्रधानमंत्री नरेन्द्र मोदी होर कल बडलै 11 बजे आकाशवाणी थमां “मन की बात” कार्यक्रम राएं देस ते विदेश दे लोकें कन्नै अपने बचार सांझे करगंन। एह महावार इस रेडियो कार्यक्रम दी 112मीं किशत होग। एह श्री मोदी हुंदे लगातार त्रीह बारी प्रधानमंत्री बनने दे परैत इस कार्यक्रम दी दूई किशत होग। एह कार्यक्रम आकाशवाणी, दूरदर्शन, एयर न्यूज वेबसाईट ते न्यूज ऑन एयर दे सारे नेटवर्क उप्पर प्रसारत होग। इस कार्यक्र दा सिद्दा प्रसारण आकाशवाणी समाचार, डी.डी.न्यूज, पीएमओ ते सूचना ते प्रसारण मंत्रालय दे यूट्यूब चैनलें उप्पर बी कीता जाग। आकाशवाणी इस कार्यक्रम दा प्रसारण हिंदी भाषा च होने दे तुरत परैत क्षेत्रीय भाषाएं च बी करोग।

<><><><><><>

JKEDA

जम्मू कश्मीर च सरकारै 2025 दे खीरी तोड़ी 40 जहार कोला बी मती इमारतें च रूफटॉप सोलर पॉवर प्लांट लोआने लेई केई प्रोजेक्ट शुरू कीते न। इंदे च सरकारी ते नीति दवै इमारतां शामिल न। आकाशवाणी जम्मू दे संवाददाता हुंदी रिपोर्ट मूजब इस पैहलकदमी कन्नै जम्मू कश्मीर च 270 मैगावाट होर सोलर एनर्जी उत्पन होई सकदी ऐ ते एहदे कन्नै 20 जहार घरें ते घट्ट कोला घट्ट 22 जहार 494 सरकारी इमारतें च इस्तेमाल कीती जाई सकदी ऐ। इसलै 60 मैगावाट कन्नै गै 3 जहार 800 रिहाशी ते 3 जहार 825 सरकारी इमारतें च सोलर एनर्जी इस्तेमान कीती जा'रदी ऐ। जम्मू कश्मीर डवैलपमेंट अजेंसी यानि जेकेईडीए एह सारा कम्म करोआ'रदी ऐ। नमीं अक्षय ऊर्जा मंत्रालय नै कलीन एनर्जी गी पूरा करने लेई 2030 तोड़ी जम्मू कश्मीर सरकारै आस्तै 500 मेघावाट दी सोलर एनर्जी उत्पन्न करने दा लक्ष्य दित्ते दा ऐ ते हाल च गै आए दे बजट च बी जम्मू कश्मीर च सोलर रूफटॉप ते सोलर पंप लोआने लेई केन्द्र सरकारै 150 करोड़ रपे दा प्रस्ताह रखे दा ऐ।

<><><><><><>

Summary Revision

भारती चुनां आयोग ते जम्मू कश्मीर दे मुख् चुनां अधिकारी हुंदे आस्सेआ जारी कार्यक्रम मूजब प्रदेश दे सब्बने मतदान केन्द्र च अज्ज 27 जुलाई, 28 जुलाई ते पही 3 ते 4 अगस्त गी बी विशेष कैंप लोआए जा करदे न। सब्बने चुनां पंजीकरण अधिकारिणं गी निर्देश दित्ता गेआ ऐ जे ओहू सरबंधत मतदान केन्द्रें पर लोडचदे फार्में ते मतदाता सूचिएं सनें बूथ सतह दे सब्बनें अफसरें दी मजूदगी जकीनी बनान। कैंप आले ध्याड़े पर मतदान केन्द्रें दी चानचक्क जांच बी कीती जाग।

<><><><><><>

Revenue Department-Poonch

राजस्व मैहकमे नै शैहरे खास पुंछ दे लोके लेई इक जमा-बंधी सरबंधी पंजीकरण ते जागरूकता कैप दा आयोजन कीता। इस कैप च सरकार आस्सेआ लोके गी जमा-बंधी सरबंधी पंजीकरण ते महत्व बारे ते जिंदा काल होइ गेदा ऐ, उंदे नां राजस्व रिकार्ड थमां हटाने लेई दस्सेआ जाग। कैप दरान राजस्व मैहकमे दे अधिकारी लोके दे सामने राजस्व रिकार्ड फड़गन ते जिसी कुसै गी कोइ आपत्ति होए उसलै पुच्छ-गिच्छ करी सकदा ऐ।

<><><><><><>